



Deddf Casglu a Rheoli Trethi (Cymru) 2016

2016 dccc 6

RHAN 8

ADOLYGIADAU AC APELAU

PENNOD 2

ADOLYGIADAU

173 Gofyn am adolygiad

- (1) Rhaid gwneud cais i adolygu penderfyniad apeliadwy drwy roi hysbysiad (“hysbysiad am gais”) i ACC.
- (2) Rhaid i hysbysiad am gais nodi’r sail ar gyfer yr adolygiad.
- (3) Ond ni chaiff person roi hysbysiad am gais os yw is-adran (4), (5) neu (6) yn gymwys.
- (4) Mae’r is-adran hon yn gymwys—
 - (a) os penderfyniad i ddiwygio ffurflen dreth y person o dan adran 45 tra bo ymholiad yn mynd rhagddo yw’r penderfyniad y mae’r person yn dymuno i ACC ei adolygu, a
 - (b) os nad yw’r ymholiad wedi ei gwblhau hyd yma.
- (5) Mae’r is-adran hon yn gymwys pan fo’r person wedi apelio i’r tribiwnlys yn erbyn y penderfyniad ac nad yw’r apêl wedi ei thynnu’n ôl.
- (6) Mae’r is-adran hon yn gymwys—
 - (a) pan fo’r person wedi ymrwymo i gytundeb setlo mewn perthynas â’r penderfyniad y mae’r person yn dymuno i ACC ei adolygu, a
 - (b) pan na fo’r person wedi rhoi hysbysiad tynnu’n ôl o’r cytundeb o dan adran 184(4).

- (7) Nid yw'r adran hon yn rhwystro ymdrin â phenderfyniad apeliadwy yn unol ag adran 184.

174 Terfyn amser ar gyfer gofyn am adolygiad

- (1) Pan roddir hysbysiad am gais i ACC cyn diwedd y cyfnod perthnasol, rhaid i ACC adolygu'r penderfyniad y mae'r hysbysiad yn ymwneud ag ef.
- (2) Yn ddarostyngedig i is-adran (3), y cyfnod perthnasol yw—
- pan fo'r cais yn ymwneud â phenderfyniad i ddiwygio ffurflen dreth y person o dan adran 45 tra bo ymholiad yn mynd rhagddo, y cyfnod o 30 o ddiwrnodau sy'n dechrau â'r diwrnod y mae ACC yn dyroddi hysbysiad cau sy'n hysbysu'r person fod yr ymholiad wedi ei gwblhau;
 - pan fo'r cais yn ymwneud â phenderfyniad o unrhyw fath arall, y cyfnod o 30 o ddiwrnodau sy'n dechrau â'r diwrnod y mae ACC yn dyroddi'r hysbysiad sy'n hysbysu'r person am y penderfyniad.
- (3) Pan fo'r person—
- wedi ymrwymo i gytundeb setlo mewn cysylltiad â'r penderfyniad y mae'r cais yn ymwneud ag ef, ond
 - wedi rhoi hysbysiad wedi hynny ei fod yn tynnu'n ôl o'r cytundeb o dan adran 184(4),
- y cyfnod perthnasol yw'r cyfnod o 30 o ddiwrnodau sy'n dechrau â'r diwrnod y dyroddir yr hysbysiad tynnu'n ôl.

175 Cais hwyr am adolygiad

- (1) Pan fo person yn rhoi hysbysiad am gais i ACC ar ôl y cyfnod perthnasol—
- caiff ACC adolygu'r penderfyniad y mae'r hysbysiad yn ymwneud ag ef, a
 - rhaid iddo wneud hynny os yw'n fodlon—
 - bod gan y person esgus rhesymol dros beidio â'i roi yn ystod y cyfnod perthnasol, a
 - ei fod wedi ei roi i ACC wedyn heb oedi afresymol.
- (2) Rhaid i ACC ddyroddi hysbysiad i'r person yn datgan a fydd yn adolygu'r penderfyniad ai peidio.
- (3) Pan fo ACC yn dyroddi hysbysiad yn datgan na fydd yn adolygu'r penderfyniad, caiff y person wneud cais i'r tribiwnlys am gyfarwyddyd sy'n ei gwneud yn ofynnol i ACC gynnal yr adolygiad.
- (4) Caiff y tribiwnlys roi cyfarwyddyd o'r fath, a rhaid iddo wneud hynny os yw'n fodlon—
- bod gan y ceisydd esgus rhesymol dros beidio â rhoi hysbysiad am y cais i ACC yn ystod y cyfnod perthnasol,
 - ei fod wedi ei roi i ACC wedyn heb oedi afresymol, ac yna
 - ei fod wedi gwneud cais i'r tribiwnlys heb oedi afresymol.
- (5) Yn yr adran hon, mae i “y cyfnod perthnasol” yr un ystyr ag yn adran 174.

176 Cynnal adolygiad

- (1) Mae natur a chwmpas yr adolygiad i fod fel ag y maent yn ymddangos yn briodol i ACC o dan yr amgylchiadau.
- (2) At ddiben is-adran (1), rhaid i ACC, yn benodol, roi sylw i gamau a gymerwyd cyn dechrau'r adolygiad—
 - (a) gan ACC wrth ddod i'r penderfyniad, a
 - (b) gan unrhyw berson wrth geisio datrys anghytundeb ynghylch y penderfyniad.
- (3) Rhaid i'r adolygiad ystyried unrhyw sylwadau a wneir neu a wnaed gan y person a roddodd yr hysbysiad am gais ar adeg sy'n rhoi cyfle rhesymol i ACC eu hystyried.
- (4) Caiff yr adolygiad ddod i'r casgliad bod penderfyniad ACC—
 - (a) i'w gadarnhau,
 - (b) i'w amrywio, neu
 - (c) i'w ganslo.
- (5) Rhaid i ACC ddyroddi hysbysiad am gasgliadau'r adolygiad i'r person a roddodd yr hysbysiad am gais—
 - (a) o fewn y cyfnod o 45 o ddiwrnodau sy'n dechrau â'r diwrnod y derbyniodd ACC yr hysbysiad am gais, neu
 - (b) o fewn unrhyw gyfnod arall y bydd ACC a'r person yn cytuno arno.
- (6) Pan fo'r tribiwnlys yn cyfarwyddo ACC i gynnal adolygiad, rhaid i ACC ddyroddi hysbysiad am gasgliadau'r adolygiad—
 - (a) o fewn y cyfnod o 45 o ddiwrnodau sy'n dechrau â'r diwrnod y rhoddodd y tribiwnlys y cyfarwyddyd, neu
 - (b) o fewn unrhyw gyfnod arall y bydd ACC a'r person yn cytuno arno.
- (7) Os yw ACC yn methu â dyroddi hysbysiad yn unol ag is-adran (5) neu (6)—
 - (a) bernir bod yr adolygiad wedi dod i'r casgliad bod penderfyniad ACC i'w gadarnhau, a
 - (b) rhaid i ACC ddyroddi hysbysiad i'r perwyl hwnnw i'r person a roddodd yr hysbysiad am gais.

177 Effaith casgliadau adolygiad

- (1) Pan fo ACC yn dyroddi hysbysiad o dan adran 176(5), (6) neu (7) mewn perthynas ag adolygiad—
 - (a) mae'r casgliadau yn yr hysbysiad i'w trin fel pe bai'r tribiwnlys wedi dyfarnu apêl yn erbyn y penderfyniad y mae'r hysbysiad yn ymwneud ag ef yn y modd a nodir yn y casgliadau, ond
 - (b) nid yw'r casgliadau i'w trin fel penderfyniad gan y tribiwnlys at ddibenion adrannau 9 i 13 o [Ddeddf Tribiwnlysoedd, Llysoedd a Gorfodaeth 2007](#) (p. 15) (adolygu penderfyniadau ac apelau yn erbyn penderfyniadau).
- (2) Ond nid yw is-adran (1) yn gymwys os yw'r canlynol yn berthnasol, neu i'r graddau y mae'r canlynol yn berthnasol—
 - (a) bod ACC a'r person yn ymrwymo wedi hynny i gytundeb setlo mewn perthynas â'r penderfyniad y mae'r hysbysiad yn ymwneud ag ef, neu
 - (b) bod y tribiwnlys yn dyfarnu wedi hynny ar apêl yn erbyn y penderfyniad y mae'r hysbysiad yn ymwneud ag ef.